



# ШЫБН

1925 чылдың  
август 31-де үнүп  
эгелээн

№ 33 (17362)

2007 чылдың  
МАРТ 15,  
четверг

Номерни парлалгаже  
дужааганы:  
график езугаар — 21.00,  
херек кырында — 17.30.  
Садар өртээ 4 рубль.

## НИИТИЛЕЛ-ПОЛИТИКТИГ СОЛУН

Чазак Даргазының  
ажыл-албаны

Соңгулда  
хоойлужудулгазында  
хажыдыышкын  
көй, буруулугларга  
кемчегни онаар

Тыва Республиканың Чазак Даргазы Ш.Д.Ооржак Тыва Республиканың Улуг Хуралының Төлээлекчилер болгаш Хоойлужудулга палаталарының ийиги чыыжының депутаттарының катап соңгулдалары 2007 чылдың март 11-де болуп турар хүнде Кызыл хоорайның, Улуг-Хем, Барыын-Хемчик, Мөңгүн-Тайга кожууннарның соңгулда участоттарына байдалдың дугайында айтырыгны чугаалашкан хуралды март 13-те эрттирген.

Тыва Республиканың Соңгулда комиссиязының даргазы Ш.Ч. Монгуштуң, Кызыл хоорайның девискээр соңгулда комиссиязының даргазы Е.В. Масловтуң, ТР-ниң иштики херектер сайыды В.И. Лесняктың информацияларын аңаа дыңнаан. Оларның дыңнатканын езугаар алырга, республиканың күүсекчи эрге-чагырга болгаш тус чер бот-башкарылга органнары, Иштики херектер яамызы соңгулда участоттарының ажил-даарына таарымчалыг байдалды тургускан, корум-чурум камгалаар кемчеглерни алган, бадылаашкынга соңгукчулар иделкейлиг киришкен. Ооңбиле чергелештир Кызыл хоорайның девискээр соңгулда комиссиязына, ТР-ниң Иштики херектер яамызына соңгулда хоойлужудулгазында хажыдыышкыннар дугайында соңгукчулардан, депутаттарга кандидаттардан, оларның штабтарының кежигүннеринден 100 ажыг билдиришкinner, дыңнадыглар кирген. Ол хомудалдар факт-барымдааларбиле бадыткаттынган болуп турар, оларны кыска хуусаада сайгарып көөр, чогуур кемчеглерни алыр дугайында шыңгы чугаа хуралга болган.

Сибирь федералдыг округта РФ-тиң Президентизиниң бүрүн эргелиг төлээзиниң Аппарадының федералдыг Кол инспектору В.И.Чернышев, РФ-тиң Федералдыг айыыл чок чорук албанының Тыва Республикада эргелелиниң начальнигиниң оралакчызы И.В. Толстонос, Тыва Республиканың прокурорунуң бирги оралакчызы М.И.Санчай, ТР-ниң Чазак Даргазының бирги оралакчызы А.В.Брокерт, ТР-ниң Чазак Даргазының чанында Хөй-ниити айыыл чок чорук чөвүлелиниң секретариадының удуртукчузу Б.С.Шыырап болгаш өскелер-даа хуралдың ажылынга киришкен.

Бистиң корр.

Соңгулдаларда хажыдыышкыннар

## В.М. БАРТЫНА-САДЫНЫҢ БӨЛҮҮ ШОЛБАН ИРГИТ-БИЛЕ «САНАЖЫР» БОДААН

Эрткен улуг-хүнде, март 11-де, Россияның 14 регионунга соңгулда кампаниялары болуп эрткен. Ооң түңнелдерин тайылбырлап тура, РФ-тиң Төп соңгулда комиссиязының удуртулгазы-даа, россияжи деңнелдиң политиктери-даа чер-черлерге болгулаан хөй санныг хажыдыышкыннарны бадыткаан. РФКП-ниң баштыгы Геннадий Зюганов эрткен соңгулда кампаниязынга хамаарыштыр бодунуң үзел-бодалын илередип тура, мынча дээн: «Москвага чогааттынган болгаш ажылаттынган келген эң хирлиг соңгулда технологияларын бо удаада регионнарга тарадып непереткен». А Тывага, ылаңгыя ооң найысылалы Кызылга болуп эрткен соңгулдалар база-ла хөй санныг хажыдыышкыннар-биле элбек болган.

Ниитизи-биле алырга, соңгулда кампаниязының үезиниң дургузунда республиканың эрге-хоойлу камгалаар органнарынга соңгулда хоойлужудулгазының хажыдыышкыннарның талазы-биле 80 ажыг хомудал билдиришкinner хамаатылардан бол-

гаш хөй-ниити организацияларындан кирген. Бо хүннерде оларга хамаарыштыр хыналдаларны чорудуп, кемчеглерни ап турар.

Кызыл хоорайның девискээр соңгулда комиссиязының даргазы Е.В. Масловтуң чугаазы-биле алырга, март 11-де бадылаашкын

хүнүнүң дургузунда №1, 3, 4, 5 чаңгыс мандаттыг соңгулда округтарының девискээрлеринге кандыг-бир кандидат дээш, ылаңгыя З.Н. Сат, С.В. Сафрин, Б.К. Балчий-оол, В.А. Ушкалов дээш бадылаарынче соңгукчуларны күткүп, хээлилеп, оларга акша-төгерики, аш-чемни, арага-дарыны үлеп турган фактылар илереттинген.

Акша-төгерики үлелге-биле чергелештир, А 447 күрүне дугаарлыг сарыг өңнүг «Газельге», М309АА күрүне дугаарлыг ногаан өңнүг «Жигулиге» В.В. Вусатый дээш, О 053 ОО күрүне дугаарлыг «Волгага» В.А. Ушкалов дээш, 520 күрүне дугаарлыг мөңгүнелчек өңнүг ВАЗ-21014 автомашинага, Е 427 АН дугаарлыг чырык-куу өңнүг Тойота-Камриге, 935 дугаарлыг көк өңнүг ВАЗ-2109-ка, 609 дугаарлыг «Жигулиге» З.Н. Сат дээш бадыладыры-биле соңгук-

чуларны соңгулда участоттарынга чедиргени бүртүктеттинген. Оон аңгыда чамдык кижилер Зоя Назытьевна Сат дээш бадылаарынче суртаалдап, 1000 рубль түңнүг шаңнал акшаны бээрин азап турганнар. А «Чаңгыс демниг Россия» партиязының бүзүреттирген кижизиниң медеглээни-биле алырга, бадылаашкын хүнүнде, март 11-ниң 10 шакта Набережная кудумчузунда №17 соңгулда участотунга ТР-ниң Улуг Хуралының Хоойлужудулга палатаның депутадынга кандидат В.А. Ушкалов халдып келгеш, ол хүн ужура-жылгалар эрттирген, суртаал чорударын хоойлуда хоруп каан турбуже, соңгукчулар-биле ужуражып, бадылаашкынның кандыг янзылыг эртип турарының дугайында чугааны чорудуп, оларга таакпы үлеп турган болуп турар.

(Уланчызы 2-ги арында).

Эрзин кожууну — мал ажыл-агыйын сайзырадып хөгжүдеринге кончуг таарымчалыг черлерниң бирээзи. Чүге дээрге, Моол-биле кызыгаарлашкан бо кожуунуң кезек-кезек бүүрелчинниг дагларлыг карак четпес делгем одарларлыг ховулары езулуг-ла мал азырап өстүреринге чаяттынган дизе хөөрем чок. Таптаашкын үези дижир чылдарывыста кончуг хөй кыштаглар, ховуларга кудуктар кастынган турган болгаш, мал өстүреринге таарымчалыг дээрзин база эрткен үелеривис шагдала бадыткап каан. Ук калбак ховуларга шагда ээреннер безин өөр-өөр чоруур турганын төөгүдөн билир бис.

Амгы үеде ук кожуунда байдал кандыгыл дээрзин сонуурган, март айның эгезинде ынаар четкеш келдивис. Республикага ат-сураа алдаржып турган «Чаа орук» совхозу чурттап эрткенивис экономиктиг сандараашкын чылдарының соонда, 2004 чылда «Бай-Хөл» аттыг көдээ ажыл-агыйның бүдүрүлгө кооперативи (КБК) кылдыр эде организастаттынган. Эң-не солун чүве, кооперативтиң ажыл-агыйын база-ла ажыл-агыйның 300 ажыг баш хоюн хууда малы-биле катый тудуп олурар малчын Александр Кашкаевич Дамбаның удуртуп турары. Малчын-дарга-биле бисти таныштырар дээш Эрзин кожуунуң чагырга даргазының экономика талазы-биле оралакчызы М.К.С. Бүрэн Бай-Дагдан ук кооперативтиң улуг бухгалтери С.С. Бюрбюну алгаш, катый халтывыс. Светлана Соляновнадан орук ара кооперативтиң өңчүзүн билип алдым. Кооперативте бо хүннерде 11 муң 900 ажыг шээр мал, ооң ишинде 848 өшкү, 23 баш тева, 26 инек болгаш 61 баш чылгы малды 43 коданда тудуп турар. Колдуунда мал ажыл-агыйында аныяктарны



Александр, Ирина Дамбалар.

## МАЛЧЫН ДАРГА

хаара туткан, хоочун малчыннар ындыг-ла хөй эвес. Кооперативте 92 ажылчын бар. Ийи суг сөөртүр машиналыг, 4 тракторлуг, 2 тележка болгаш көдээ ажыл-агый машиналары, ГАЗ-53 маркалыг 2 машина, бир УАЗ-469 база бир автобустуг, оозун арендада берипкен. Чамдык кооперативтерге көөрде, шаа-биле бай-шыырак деп санап болур.

Бо хүннерде кооперативтиң ажыл-чорудулгазын А.К. Дамба удуртуп турар. Ол боду кара чажындан ада-иезиниң аалынга мал аразынга өскен, ынчангаш мал ажыл-агыйын өзээнге киир билир. Черле малчын өг-бүледен үнген болгаш, шеригден халашкан

дораан ол төрөөн совхозунга чылгычылап ажылдаан. 1993 чылдан эгелээш, 2003 чылга чедир малчыннаан. Күш-ажылга кызымак, тура-соруктуг, хөй-аъттыг малчынның чыл санында багай эвес көргүзүглери чедип ап, салдынган планын доктаамал күүседип келгенин барымдаалааш, Чазак ооң ажылын үнелеп көргеш, Тыва Республиканың ордени-биле шаңнаан.

Чон караа көскү деп тыва улустуң чугаазы бар. Ажылынга харысалгалыг аныяк малчынның ажыл-ишчизин эш-өөрү үнелеп көргеш, кооперативтиң ажыл-агыйын сегидип болур деп бүзүрел-биле ону ажыл-агыйның дар-

газынга үзел-саналы-биле идип үндүрген. Александр Кашкаевич эш-өөрүнүң бүзүрелин шынызыдар дээш, бөгүнге дээр малчынна-вышаан, ажыл-агыйны удуртуп-башкарып чоруур. Кооперативтиң ажыл-чорудулгазының кол өзээ чүгле мал ажыл-агыйы болганда, ол эш-өөрүнде байдалды кымдан артык эки билир, чүге дизе боду база-ла ук ажылды херек кырында тудуп көрүп чоруур-ла болгай. Александр Дамбаның ажылдап эгелээнинден тура, мал бажы өскен, чаа-чаа коданнар немешкен. Чижээ, эрткен чылын немей 6 коданны тускайлааш, малчыннарга хүлээткен.

(Уланчызы 3-кү арында).













